

四庫全書

子部

欽定四庫全書

子部

大學衍義卷

二十九
三十

詳校官中書臣孫球

刑部郎中臣許兆椿覆勘

總校官降調編修臣倉聖脈

校對官編修臣汪學金

謄錄監生臣陳裕昆

欽定四庫全書

大學衍義卷二十九

宋 真德秀 撰

誠意正心之要一

崇敬畏

遇災之敬

帝曰來禹降水傲子

降亦作洛
洪水也

臣按孟子曰水逆行謂之洚水其災雖起堯時至

舜攝位害猶未息故舜自謂此天之所以儆我也
聖帝明王之畏天省已類如此其後成湯憂旱亦
以六事自責曰政不節與使人疾與何以不雨至
此極也宮室崇與女謁盛與何以不雨至此極也
苞苴行與讒夫昌與何以不雨至此極也夫以成
湯之聖安得有此而反躬自責若是其至湯之心
卽舜之心也至漢武帝時公孫弘對策乃曰堯遭
洪水使禹治之未聞禹之有水也若湯之旱則桀

之餘烈也夫舜以水自微而弘歸之於堯湯以旱
自責而弘歸之於桀姦諛之情所以惑誤其君使
傲忽天戒者凡皆若此不可以不察

伊陟相太戊

太戊商中宗也
伊陟尹之子

亳有祥

亳國都也
祥異也

桑穀共

生于朝伊陟贊于巫咸作咸乂四篇

臣按咸乂四篇今亡而史記叙之曰帝太戊立伊
陟為相桑穀生于朝一暮大拱太戊懼問伊陟伊
陟曰臣聞妖不勝德帝之政其有關與帝其修德

太戊從之而祥桑枯死夫太戊遇災而聽忠言修
闕政亟以銷復故周公稱之曰昔在殷王中宗嚴
恭寅畏天命自度謂其能盡敬畏之誠而以天命
律已也可謂知中宗之心矣

高宗祭成湯有飛雉升鼎耳而雊

雊鳴也

祖己

賢臣

曰惟先

格王正厥事乃訓于王曰惟天降下民典厥義

典常也義理也

降年有永有不永

永長也

非天天民民中絕命民有不若

德不聽罪天既孚命正厥德

孚信也

乃曰其如台

台我鳴

呼王司敬民

司主也

罔非天庥

罔無也
庥嗣也

典祀無豐于昵

豐厚

也昵
觀也

先儒蘇軾曰高宗彤祭之日野雉鳴于鼎耳此為神告以宗廟祭祀之失審矣故祖已謂當先格王心之非蓋武丁不專修人事數祭以媚神而祭又豐於親廟敬父薄祖此失之大者故祖已先格而正之夫天之監人有常理而降年有永有不永者非天天人之或中道自絕於天也人有不順德不服罪者天未即

誅絕而以孽祥為符信以正其德人乃曰是孽祥其如我何則天必誅絕之矣今王專主於敬民而已數祭無益夫先王莫非天嗣者常祀而豐于昵其可乎或者謂天災不可以象類求夫書曰越有鳴雉足矣而又記其鳴於耳非以耳為祥乎人君於天下無所畏惟天可以傲之今日天災不可以象類求我自視無過則已矣為國之害莫大於此

臣按軾所謂以象類求者謂洪範五行之說也鳴

不於它而於鼎耳蓋鼎者祭祀之器耳主聽聽不
聰則災孽生焉漢儒之論災異大抵若此成帝時
博士行大射禮有飛雉集于庭登堂而雉又集太
常宗正丞相御史車騎府又集未央宮承明殿御
史大夫王音進言天地之氣以類相應譴告人主
甚微而著雉者聽察先聞雷聲故經載高宗雉雉
之異以明轉禍為福之驗今以博士行禮之日大
衆聚會飛集于庭歷階登堂歷三公之府典宗廟骨

肉之官然後入宮其宿留告曉人具備雖人道相
戒何以過是後帝使詔音曰聞捕得雉毛羽頗摧
折類拘執者得無人為之音復對曰陛下安得此
亡國之語不知誰主為佞諂之計誣亂聖聽如此
陛下即位十五年繼嗣不立日日駕車而出失行流
聞海內傳之甚於京師皇天數見災異欲人變更
尚不能感動陛下臣子何望宜謀于賢哲克已復
禮以求天意則繼嗣尚可立災異尚可銷也漢去

三代未遠一雉之異而君臣相倣如此故附著焉

雲漢仍叔美宣王也

仍叔周大夫

遇災而懼側身修行欲銷

去之百姓見憂故作是詩也其一章曰倬彼雲漢昭回

于天

倬明大也雲漢天河昭光也回轉也

王曰於乎何辜今之人天降喪

亂饑饉薦臻

薦重也臻至也

靡神不舉靡愛斯牲圭璧既卒

卒盡

也寧莫我聽其二章曰早既太甚蘊隆蟲蟲

蘊積也隆盛也蟲蟲

早氣也

不殄禋祀

殄絕也

自郊徂宮

郊祀天也徂往也宮廟也

上下奠瘞

上祭天下祭地奠其禮瘞其物

靡神不宗

宗謂尊事之

后稷不克

克能也

上帝

不臨

鑒臨也

耗斁下土

斁敗也

寧丁我躬三章曰早既太甚

則不可推

不可推知

兢兢業業

兢兢恐也業業危也

如霆如雷周餘黎

民靡有子遺

子獨立貌

四章曰早既太甚則不可沮赫赫炎

炎云我無所大命近止

大命民死生之命

靡膽靡顧

言無顧視之者

羣

公先正則不我助

謂百辟卿士之從零祀者

父母先祖胡寧忍予五

章曰早既太甚滌滌山川

山枯川竭如洗滌也

早魃為虐

魃旱神

如

悵如焚

悵燎之也

我心憚暑

憚畏也

憂心如熏羣公先正則不

我聞昊天上帝寧俾我遜

臣按此詩蓋宣王憂旱責躬之詞其首曰雲漢爛然雨未有兆今之民何罪而數罹饑饉之厄乎神之能為雨者無不禱矣牲牷不敢愛圭璧不敢惜而神不我聽何也二章則言早已太甚暑威熾然自郊至廟所以祭享者無不至矣莫親於后稷而不能揀莫尊於上帝而不見臨與其耗敗下土民受其害寧使我躬當之三章又言致旱之由不可推知兢畏危懼殆如雷霆之在上周自厲王板蕩

之餘民之僅存者無幾今又重之以旱將無復有
子遺者矣四章則言旱甚而不可止我將無所自
容民之大命死亡無日莫有顧視之者羣公先正
之與祀者曾不我助而父母以及先祖亦何忍使
予至此乎五章言旱之已甚雖山川亦為槁竭使
我心如焚灼羣公先正不我聽聞天既見譴寧使
我遜而去位以謝罪於天不可使民被其毒五章
而下大略申復前意詳味其辭敬天憂民之心側

身修行之實至今猶可想見此其所以為中興之

治與

正月

正音政

大夫刺幽王也其首章曰正月繁霜

正月夏之四月

繁多也

我心憂傷民之訛言

訛偽也

亦孔之將

將大也

念我獨

兮憂心京京

京京大也

哀我小心癯憂以痒

癯憂幽憂也痒痛也

臣按正月純陽用事為正陽之月天地長養之時

而多霜焉其異大矣而民言爭為訛偽其異又大於繁霜也曰訛言者何以是為非以非為是以忠

為佞以佞為忠此所謂訛言也訛言興則君子小人易位而邪正混淆所以致繁霜之災也在位之君子為之憂為之病而王莫知焉其致禍敗也宜哉

十月之交大夫刺幽王也其一章曰十月之交

十月夏正建亥

之朔日辛卯日有食之亦孔之醜

醜惡也

彼月而微此日

而微今此下民亦孔之哀二章曰日月告凶不用其行四國無政不用其良彼月而食則維其常此日而食于

何不臧

臧善也

三章曰煜煜震電

煜煜電光也 親震雷也

不寧不令

寧安

也令善也

百川沸騰山冢萃崩

冢頂也萃崔嵬之狀

高岸為谷深谷為

陵哀今之人胡惜莫懲

惜慘也

皇父卿士

皇父字也

番為司徒

番氏也

家伯為宰

伯字也

仲允膳夫

仲字也

聚子內史

聚氏也

蹶

維趣馬

蹶氏也

楅維師氏

楅氏也卿士以下皆官名

豔妻煽方處

豔妻謂褒

如也煽熾也處居也

六章曰黽勉從事不敢告勞無罪無辜讒口

翼翼下民之孽匪降自天噂沓背憎職競由人

臣按四月繁霜幽王不知戒也於是十月之朔日

有食之考諸先儒之論以為日月之食雖有常度然王者修德行政用賢去姦能使陽盛足以勝陰陰衰不能侵陽則日月之行雖或當食而不食焉若國無政不用善臣子背君父妾婦乘其夫小入陵君子夷狄侵中國則陰盛陽微當食必食雖曰行有常度而實為非常之變矣正陽之月日有食之古之深忌也十月純陰而食詩人亦刺之者蓋純陽而食陽弱之甚純陰而食陰壯之甚故均於

為異焉亦孔之醜言其甚可醜也月有虧微理之
正也日亦虧微豈不甚可哀乎原日月之吉凶不
用其行者以四國無政不用其良故也月食陽勝
陰也日食陰勝陽也陽尊陰卑陰亢陽而不勝乃
其常也陰勝陽而揜之可以為常乎曰于何不臧
言何由而有此不善之證也雷發聲于春收聲于
秋今既十月矣而雷電交作山傾川涌陵谷改易
高深易位此為何景而幽王曾莫之懲刺王而曰

今之人者不欲斥言也前云不用其良謂善人失職也善人失職由小人之用事也小人用事于外者由婦人主之于中也故至此歷叙其人焉卿士司徒而下皆王朝貴近之官而皇父之屬分據其位所以然者有褒姒為之地也女子小人内外交締此災異所以併至也善人君子遭值此時黽勉從事未嘗敢以勞苦自言而無罪無辜橫罹讒毀以此知山摧川沸之變非天為之實嚆咎背憎之

人為之也蓋上天仁愛非有意於降災乃人自取之耳可不戒哉

齊有彗星

彗星除舊布新之象

齊侯使禳之

景公也

晏子

晏嬰也

曰無

益也祇取誣焉天道不諂不貳其命若之何禳之且天

之有彗也以除穢也

彗之狀如帚故曰除穢

君無穢德又何禳焉

若德之穢禳之何損公說乃止

臣按晏子於是知天道矣古之應天者惟有敬德而已禱禳非所恃也後世神怪之說興以為災異

可以禳而去於是人主不復有畏天之心此為害之大者也

宋景公時熒惑守心

熒惑火星也心東方宿也

心宋之分野也憂之

司星子韋曰可移於相公曰相吾之股肱曰可移於民公曰君者待民曰可移於歲公曰歲飢民困吾誰為君子韋曰天高聽卑君有君人之言三熒惑宜有動於是候之果徙三度

臣按易曰言行君子所以動天地也景公三言之

善而法星為徙三度天人相應其捷如此可不畏哉
漢董仲舒告武帝曰天人相與之際甚可畏也國家將
有失道之敗天迺先出災害以譴告之不知自省又出
怪異以警懼之尚不知變而傷敗迺至以此見天心之
仁愛人君而欲止其亂也自非大無道之世天盡欲扶
持而全安之事在彊勉而已

仲舒又言人之所為其美惡之極乃與天地流通而往
來相應

元帝時日食地震匡衡上疏曰天人之際精祲有以相
盪善惡有以相推事作於下者象動於上陰陽之理各
應其感陰變則靜者動謂地震也陽蔽則明者晦謂日食也水旱
之災隨類而至

哀帝元壽元年日有蝕之孔光對曰臣聞師曰天右與
王者故災異數見以譴告之欲其改更若不畏懼有以
塞除而輕忽簡誣則凶罰加焉其至可必詩曰敬之敬
之天維顯思命不易哉又曰畏天之威于時保之皆謂

不懼者凶懼之則吉也書曰天棐諶辭言有誠道天輔之也明承順天道在於崇德博施加精致誠孳孳而已俗之祈禳小數終無益於應天較然甚明無可疑惑是年息夫躬建言災異數見恐必有非常之變可遣大將軍行邊兵敕武備斬一郡守以立威應變上然之以問丞相王嘉嘉對曰動民以行不以言應天以實不以文下民細微猶不可詐況於上天神明而可欺哉天之見異所以敕戒人君欲令覺悟反正推誠行善民心說

而天意解矣謀動干戈設為權變非應天之道也

臣按漢儒之言天者衆矣惟仲舒最為精粹其曰
人之所為美惡之極與天地流通往來相應者尤
古今之格言也匡衡以下其言亦足以警世主故
剟其略著于篇云

以上論遇災之敬

崇敬畏

臨民之敬

五子之歌

夏書篇名
詳見後

其一曰皇祖有訓

皇祖大禹也

民可近

不可下民惟邦本本固邦寧予視天下愚夫愚婦一能
勝予一人三失怨豈在明不見是圖予臨兆民懍乎若
朽索之馭六馬為人上者柰何不敬

臣按君之與民以分言之則若霄壤之不侔以情
言之則若心體之相資故可親而近之不可卑而
遠之也國之有民猶木之有根根搖則木拔民離
則國危匹夫匹婦若無所知然離而聽之則愚合

而聽之則聖故大禹自謂天下之愚夫愚婦有能勝我者蓋衆多之智慮雖聖人有不能加焉敢以已之聖為可恃而民之愚為可忽乎三失謂失之衆也一失猶不可況至於三凡民情之怨忿其端甚微其極至於不可禦圖於未形則易抹於已著則難六馬者駕車之馬而六轡所以馭之車賴馬馬賴轡猶君之賴民也朽索馭馬必危非道臨民必離故大禹之心常慄乎其不自保也然則為人

上者柰何不敬後世之君以一人而肆於民上者
視大禹之訓宜知戒矣

召誥

召公作以
告成王

嗚呼有王雖小元子哉其不能誠于小

民今休

丕大也誠和
也休美也

王不敢後用顧畏于民

咄險
也

臣按成王幼冲在位召公元老恐其未知民之可
畏也則歎息而言王之年雖小而任則重若能大
和于小民則善矣蓋小民雖甚微而至為可畏王
其毋或敢後用顧畏于民之咄險可也夫民若何

其險邪曰朽索馭馬前聖言之水能覆舟後賢喻之天下之險孰逾乎此召公此篇言畏天必及民是畏民當如畏天也周公作康誥亦曰迪畏天顯小民多士曰罔顧于天顯民祇周召之啟告其君者如出一口人主其可不深念哉

孟子曰民為貴社稷次之君為輕

臣按君者神人之主君為貴社稷次之而民又次之乃其常也而孟子顧反言之何哉戰國之時視

民如草芥不知廢興存亡皆此焉出故其言若此
使知民之貴甚於社稷其敢以君之貴而嫚其民
乎

以上論臨民之敬

崇敬畏

治事之敬

堯典乃命羲和

羲氏和氏掌天地四時之官

欽若昊天

欽敬也若順也元氣廣大

謂之昊天

歷象日月星辰敬授人時

人時謂四時農功之時

臣按奉天時以興農功事之至重故命羲和敬以授民敬之見於經者始此其分命曰寅賓出日曰寅饒納日蓋於日之出入必敬候之也至於咨鯀以治水曰往欽哉釐降二女亦曰欽哉此堯之敬見於事者也其於卹刑於敷教於典禮於咨牧不曰欽則曰寅不曰寅則曰敬此舜之敬見於事者也天下萬事莫不本之一心敬則立嫚則隳雖至細微亦不可忽故堯舜之敬不獨修身為然至於

應事亦莫不然後世人主既鮮知以敬治身而臨
事尤多輕忽此禍敗所由基也臣故撫二典所記
以為後王之法云

以上論治事之敬

崇敬畏

操存省察之功

詩思齊之三章

文王詩

雝雝在宮

雝與雍同和也

肅肅在廟

肅敬也

不顯亦臨無射亦保

射厭也保守也

臣按此詩言文王之在宮中則雖雖然和在宗廟則肅肅然而敬從容中道如此然持守之功未嘗斯須廢也故其所處雖非顯明之地常若天地神明之在其上也父母師保之在其前也雖未嘗有厭倦之心而嚴於自保常恐燕安怠惰之私萌於中邪僻嫚易之氣設於體也斯其所以為純亦不已與

抑之五章曰視爾友君子輯柔爾顏

輯和也

不遐有愆

遐遠

也相在爾室

相視也

尚不愧于屋漏

屋漏者室之西北隅也

無曰不

顯莫予云覲

覲見也云語辭

神之格思

格至也思語辭

不可度思

度測也

矧可射思

射音亦厭也

臣按此衛武公自警之詩也人之常情祇敬於羣居者易兢畏於獨處者難況人君之尊臨朝廷之上接對士大夫儼如朋友則和柔顏色防遠過失雖庸君猶或知勉至於宮庭屋漏之中蝸蝻蟻獲之地無法家拂士之在側有近習褻御之旁環而

能凜然自持不媿屋漏者雖明主猶或難之故武
公自謂毋曰此非顯明之地而莫予見也當知鬼
神之妙無物不體其至於是有所不可得而度者況
可有厭黷之意乎子思作中庸推明其說曰微之
顯誠之不可揜也嗚呼武公其聖賢之徒與

中庸道也者不可須臾離也可離非道也是故君子戒
慎乎其所不睹恐懼乎其所不聞莫見乎隱莫顯乎微
故君子慎其獨也

臣按朱熹之說道者日用事物當然之理皆性之德而具於心無物不有無時不然是以不可須臾離也若其可離則為外物而非道矣是以君子之心常存敬畏雖不見聞亦不敢忽所以存天理之本然而不使離於須臾之頃也隱暗處也微細事也獨者人所不知而已所獨知之地也幽暗之中細微之事跡雖未形而幾則已動人雖不知而已獨知之則是天下之事無有著見明顯而過於此

者是以君子既常戒懼而於此尤不敢忽焉所以
過人欲於將萌而不使滋長於隱微之中以至離
道之遠也臣觀自昔諸儒之釋此章者皆以戒謹
恐懼與慎獨云者通為一事至喜為析而二之蓋
以為不睹不聞者我之所不睹不聞也獨者人之
所不睹不聞也其義不容不二又以見平常之時
要切之處無所不用其謹則天理存而人欲泯
是乃所謂致中和之功也聖明之主熟玩而深

體之則天地位萬物育其源實自此出可不勉

哉

詩曰

小雅正月之篇

潛雖伏矣亦孔之昭

孔甚也昭明也

故君子內省

不疚

疚病也

無惡於志

猶言無愧於心

君子之所不可及者其惟人

之所不見乎詩曰

抑篇

相在爾室尚不愧于屋漏故君子

不動而敬不言而信

臣按此亦前章慎獨之意故引詩以明雖潛深隱
伏之地而其昭著章灼有不可掩者故君子內省

不疚而無愧於心蓋人心至靈毫髮之微少有自
欺必有不能慊音慊於中者此所謂疚也此所謂惡
也惟夫處幽如顯視獨如衆反之於己無所疚惡
焉此君子之所以大過人而人之所不能及也又
引詩謂處室之時當無媿於屋漏故君子靜而常
敬嘿而常信不待動作語言而後見也存養之功
至此非盛德其孰能之乎

樂記君子曰禮樂不可斯須去身致樂以治心則易直

子諒之心油然而生矣

易平易直正直子愛諒
信也油然而生好貌

易直子諒

之心生則樂樂則安安則久久則天天則神天則不言而信神則不怒而威致樂以治心者也致禮以治躬則莊敬莊敬則嚴威心中斯須不和不樂而鄙詐之心入之矣外貌斯須不莊不敬而易嫚之心入之矣

臣按古之君子以禮樂為治身心之本故斯須不可去之致者極其至之謂也樂之音和平中正故致此以治心則易直子諒油然而生自不能已生

則樂善端之萌自然悅豫也樂則安樂之然後安也安則久安之然後能久也久則天渾然天成無所作為也天則神變化無方不可度思也天雖不言人自信之以其不忒也神雖不怒人自畏之以其不測也生樂久安猶孟子所謂善信美大也至於天且神則大而化之矣禮以恭儉退遜為本而有節文度數之詳故致此以治身則自然莊敬莊敬則自然嚴威夫禮樂一也然以禮治身至於嚴

威而止不若樂之治心能至于天且神何也蓋天
者自然之謂治身而至于嚴威則亦自然矣其效
未嘗不同也但樂之於人能變化其氣質消融其
渣滓故禮以順之於外而樂以和之於中此表裏
交養之功而養於中者實為之主故聖門之教立
之以禮而成則以樂記禮者推明其效亦若是其
至也於是又言身心無主則邪慝易乘中心斯須
而不和樂則鄙詐入之外貌斯須而不莊敬則嫚

易入之善惡之相為消長如水火然此盛則彼衰
也鄙詐易嫚皆非本有而謂之心者和樂不存則
鄙詐入而為之主莊敬不立則易嫚入而為之主
夫既為主於內非心而何猶汙泥非水也撓而濁
之是亦水矣此禮樂之所以不可斯須去身也

君子姦聲亂色不留聰明淫樂慝禮

淫樂如鄭衛淫哇之樂慝禮如委巷

猥俗之禮

不接心術情嫚邪僻之氣不設於身體使耳目鼻

口心知

音智

百體皆由順正以行其義

臣按君子之所以自養者無它内外交致其功而已故姦聲亂色不留聰明者所以養其外也淫樂慝禮不接心術者所以養其内也外無聲色之誘則内亦正矣内無淫慝之惑則外亦正矣情嫚之氣自内出者也邪僻之氣自外入者也二者不得設於身體如是則外而耳目鼻口四肢百體内而心知皆由順正以行其義自養之功畢矣斯誼也夫人之所當知而於人主為尤切惟聖明留意焉

則顏子四勿之功可以庶幾也

孟子曰牛山之木嘗美矣以其郊於大國也斧斤伐之

可以為美乎是其日夜之所息

息生
長也

雨露之所潤非無

萌蘖之生焉牛羊又從而牧之是以若彼濯濯也

濯濯
蕩然

貌之人見其濯濯也以為未嘗有材焉此豈山之性也哉

雖存乎人者豈無仁義之心哉其所以放其良心者亦猶斧斤之於木也旦旦而伐之可以為美乎其日夜之所息平旦之氣其好惡與人相近也者幾希則其旦

晝之所為有枯亡之矣

枯槁也

枯之反覆

反覆猶展轉也

則其夜

氣不足以存夜氣不足以存則其違禽獸不遠矣人見其禽獸也而以為未嘗有才焉者是豈人之情也哉故苟得其養無物不長苟失其養無物不消孔子曰操則存舍則亡出入無時莫知其鄉惟心之謂與

朱熹曰牛山齊之東南山其木固嘗美矣以伐之者衆故失其美然氣化流行未嘗間斷日夜之間必有所生長非無萌蘖也而牛羊又從而牧之是以至於

濯濯也良心者本然之善心即所謂仁義之心也平旦之氣謂未與物接之時清明之氣也好惡與人相近言得人心之所同然也人之良心雖已放失然其日夜之間亦必有所生長故平旦未與物接其氣清明之際良心必猶有發見者但其發見至微而旦晝所為之不善又已隨而梏亡之如山木既伐猶有萌蘖而牛羊又牧之也晝之所為既有以害其夜之所息夜之所息又不能勝其晝之所為是以展轉相害

至於夜氣之生日以寢薄而不足以存其仁義之
良心則平旦之氣亦不能清而好惡遂與人遠矣又
曰孔子言心操之則在此舍之則失去其出入無定
時亦無定處如此孟子引之以明心之神明不測得
失之易而保守之難不可頃刻失其養學者當無時
而不用力使神清氣定常如平旦之時則此心常存
無適而非仁義矣程子曰心豈有出入亦以操舍而
言耳操之之道敬以直內而已又曰人理義之心未

嘗無唯持守之即在爾若於旦晝之間不至枯亡則
夜氣愈清夜氣清則平旦未與物接之時湛然虛明
氣象自可見矣孟子發此夜氣之說於學者極有力
宜熟玩而深省之也

臣按孟子之言以旦晝為主而朱熹推行其義謂
當無時而不用力則旦也晝也夜也皆兢業自持
之時其功益精密矣臣不佞又嘗推行朱熹之說
為夜氣之箴有曰盡觀夫冬之為氣乎木歸其根

蟄坯其封凝然寂然不見兆朕而造化發育之妙

實胚胎乎其中蓋闢者闢之基

自冬至以後為闢
自夏至以後為闢

貞者元之本

元於時為春
貞於時為冬

而艮所以為物之始終

艮東北
之卦

夫一晝一夜者三百六旬之積故冬為四

時之夜而夜乃一日之冬天壤之間羣物俱闢窈

乎如未判之鴻濛維人之身嚮晦宴息亦當以造

物而為宗必齋其心必肅其躬不敢弛然自放於

牀第之上使慢易非僻得以賊吾之衷雖終日乾

乾靡容一息之間斷而昏冥易忽之際尤當致戒
謹之功蓋安其身所以為朝聽晝訪之地而夜氣
深厚則仁義之心亦浩乎其不窮本既立矣而又
致察於事物周旋之頃敬義夾持動靜交養則人
欲無隙之可入天理皦乎其昭融臣謂物欲之害
夜為最甚故其說以夜為本若異於孟子朱熹者
然亦未嘗不互相發也愚者一得惟聖明幸覽擇
焉

孟子曰仁人心也義人路也舍其路而弗由放其心而不知求哀哉人有難犬放則知求之有放心而不知求學問之道無他求其放心而已矣

臣按仁者心之德也而孟子直以為人心者蓋有此心即有此仁心而不仁則非人矣孔門之言仁多矣皆指其用功處而言此則徑舉全體使人知心即仁仁即心而不可以二視之也義者人所當行之路跬步而不由乎此則陷於邪僻之徑矣世

之人乃有舍其路而弗由放其心而不知求者正猶病風喪心之人猖狂妄行而不知反也豈不可哀也哉雞犬至輕也放則知求之人心至重也放而不知求借至輕而喻至重所以使人知警也然則人心之放何也欲汨之則放利誘之則放心既放則其行必差故孟子始以人心人路並言而終獨諄諄於放心之知求能求放心則中有主而行不失矣故曰學問之道無它求其放心而已矣自

天子以至庶人其道皆然而人君以一心而受衆
攻尤易以放然則其可以不知求乎求之匪它以
敬自持而一念不敢肆而已心本非外縱之則放
求之則存猶反覆手也心存則仁存仁存則動無
非理即所謂由義路也聖學之要孰先乎此

孟子曰無或乎王之不智也

或與或同

雖有天下易生之物

也一日暴之十日寒之未有能生者也吾見亦罕矣吾
退而寒之者至矣吾如有萌焉何哉

萌謂萌蘖

今夫奕之為

數小數也

美園基也

不專心致志則不得也奕秋通國之善

奕者也

秋奕者名

使奕秋誨二人奕其一人專心致志惟奕

秋之為聽一人雖聽之一心以為有鴻鵠將至思援弓

繳而射之

繳以繩繫箭而射也

雖與之俱學弗若之矣為是其智

弗若與曰非然也

臣按孟子之告齊王也可謂至矣蓋人主之心養

之以理義則明蔽之以物欲則昏猶草木然煥之

以陽則生寒之以陰則悴正人賢士進見之時常

少理義溉灌之益其能幾何退而以邪說進者至
矣猶燠之日寡而寒之日多雖有萌芽旋復摧折
其如之何哉又以奕比之奕雖小技非專心致志
則不能精故其一以專一而得之其一雜以它念
而失之非誨者有勤惰學者有工拙由一與不一
而已故程頤為講官嘗言於上曰人主一日之間
接賢士大夫之時多親宦官宮妾之時少則可以
涵養氣質薰陶德性嗚呼人主欲以理義養其心

必如願之言而後可

孟子曰養心莫善於寡欲其為人也寡欲雖有不存焉者寡矣其為人也多欲雖有存焉者寡矣

呂大臨曰欲者感物而動也治心之道莫善於少欲則耳目之官不蔽於物而心常寧矣心常寧則定而不亂明而不暗道之所由生德之所自成也不存者枯亡之謂也寡欲之人則無枯亡之患矣其為人也多欲則好動而無節妄作而失常善端所由喪而天

理虧焉故雖有存焉者寡矣

朱熹曰欲如耳目口鼻四肢之欲雖人所不能無然多而不節未有不失其本心者程子曰所欲不必沉溺只有所向便是欲

臣按養心謂涵育其心也存謂不失其本心也多欲則戕伐其心矣烏乎養以欲戕伐則喪失其心矣烏乎存昔漢武帝謂羣臣曰吾欲云云汲黯曰陛下內多欲而外施仁義奈何欲效唐虞之治乎

夫堯舜無欲者也武帝好聲色好征伐好刑名好財利好神仙多欲者也多欲則邪念紛紜本心流蕩而欲效堯舜而施仁義得乎周敦頤曰聖可學乎曰可有要乎曰一為要一者無欲也無欲則靜虛動直靜虛則明明則通動直則公公則溥明通公溥庶矣乎然則有志於學聖人者必由寡欲克之以至於無欲而後可若夫多欲而不知所以克之方將與漢武同科而欲遠輩堯舜非臣之所敢

知也惟聖主致思焉

以上論操存省察之功

大學衍義卷二十九

欽定四庫全書

大學衍義卷三十

宋 真德秀 撰

誠意正心之要二

崇敬畏

規警言箴誠之助

大學曰湯之盤銘

盤沐浴之盤也銘者名其器以自警之辭

曰苟日新

苟誠也

日日新又日新

朱熹說已見大學或問

踐阼篇

大戴禮篇名

武王踐阼三日受丹書於太公惕若恐

懼而為戒書於席之四端為銘焉

云云全文見第二卷

席四端銘曰安樂必戒無行可悔一反一側亦不可以

忘殷監不遠視爾所代

爾武王自謂也代謂周代商

臣按安樂則易怠怠則必有悔故孟子曰生於憂患而死於安樂當寢而安逸欲易作一反一側敬不可忘淫戲自絕視彼殷商銘席四端為心之防

鑑銘曰見爾前慮爾後

臣按鑑雖甚明見面而不見背猶吾一心有所明亦有所蔽患常伏於照察所不及過常生於意慮所不周故雖聖人懍乎隱憂

盤銘曰與其溺於人也寧溺於淵溺於淵猶可游也溺於人不可捄也

臣按盤沐之盤朝夕自潔因而為銘與湯一轍溺人溺淵因水生戒蓋溺於淵者猶可浮游而出儉

夫壬人所以陷溺其君者千智百態使吾沉迷於
旨酒厚味顛倒於艷色淫聲方恬安而莫覺倏禍
敗之端興斯其為患詎止於溺淵而已乎

楹銘曰母曰胡殘

殘害也

其禍將然母曰胡害其禍將大

母曰胡傷其禍將長

臣按斯銘凡三反復蓋人情每忽於窈微而禍亂
常生於隱伏銘之於楹朝夕見之以敬以戒保於
未危

杖銘曰於乎危

於音烏一本作惡音同

於忿寔

於如字忿寔怒也

於乎失

道於嗜欲於乎相忘於富貴

臣按大易所謂懲忿窒欲逞忿者有危身之憂縱欲者有失道之辱杖之為物于以自扶操之則安全有賴舍之則顛踣可虞富貴奢淫易忘兢畏於杖為銘是或此義

牖銘曰隨天之時以地之財敬祀皇天敬以先時

臣按天實生時地實生財而君用之敢昧自來祀

以報本亦必先時匪物是貴敬以將之齊明盛服
對越上帝於牖為銘朝夕是戒

劔銘曰帶之以為服動必行德行德則興倍德則崩

倍與

背同崩
傾壞也

臣按劔之為服以示威武然德寔威本威乃德輔
惟德是行無思不服一於用威祇取顛覆額額獨
夫所寶者劔終以自燔千古之鑑

矛銘曰造矛造矛少間弗忍

少間謂
須臾也

終身之羞余一人所聞

以戒後世子孫

臣按兵者凶器聖人所重苟非拯民其忍輕用一
矛之造謹之戒之況於兵端一啓伏尸百萬流血
千里殘生靈之命奸天地之和者皆斯須不忍實
為之寧王以此戒其子孫萬世人主可違斯言

銘凡

十有四今摘其詞
義易知者如右

禮運

禮記
篇名

三公在朝三老在學

即三公之
致仕者

王前巫而後

史卜筮瞽侑

卜筮掌卜筮之官
瞽無日者誦詩以侑

也皆在左右王中心魚

為也以守至正

臣按古之所以衆建忠賢森列左右者皆以正人君之心也在朝則有三公焉所謂道之教訓傅之德義保其身體者也在廟則有三老焉所謂憲德乞言者也巫掌祀以鬼神之事告王史掌書以三皇五帝之事告王掌卜筮者以吉凶諫王瞽矇之叟以歌詩諫王一人之身而左右前後挾而維之以引以翼有孝有德雖欲斯須自放得乎故王中心

它無所為惟守至正而已後世人主所親者褻御
近習所說者淫聲美色狐媚蠱惑者千態萬貌雖
欲無邪其思得乎此君德之所以不如古也

古之君子必佩玉右徵角左宮羽

宮商角徵羽五音也
佩在右者其音中徵

角在左者其
音中宮羽

趨以采齊

路門外之樂節也門外謂之趨
齊音茨采齊即今楚茨之詩

行以肆夏

登降之樂節也肆
夏即今時邁之詩

周旋中規

周旋反行
也宜圓

折旋

中矩

折義曲行
也宜方

進則揖之退則揚之然後玉鏘鳴也

揖之

謂小僂佩見於前揚之謂
小仰佩見於後鏘玉聲

君子在車則聞鑾和之聲

鑾和

皆鈴聲

行則鳴佩玉是以非辟之心無自入也

臣按古之君子於所以養其心者無不至也佩玉中宮徵之音步趨有詩樂之節行必中矩在車則聞鑾和進退俯仰之間出入動靜之際莫不節之以禮和之以樂故於是時防邪僻而導中正其為功也易後世一切無之而所以熒惑斷喪者則不可勝數故於是時防邪僻而導中正其為力也難夫惟知其難而益勉持敬之功庶乎非僻無自

而入不然非臣之所敢知也

國語衛武公年數九十有五矣猶箴儆於國曰自卿至

于師長士

卿者執政之官師長官師之長士謂上中下士

苟在朝者無謂我耄

而舍我必恭恪於朝朝夕以交戒我聞一二之言必誦

志而納之以訓道我

謂聞人之言必誦念記憶而納之也志猶記也

在與有旅

賁之規

與車也旅賁虎賁也

位宁有官師之典

宁者人君之位

倚几有誦

訓之諫

倚几閒居之時誦訓主誦書之官

居寢有誓御之箴

居寢燕息之時誓御

謂近習也

臨事有瞽史之道

瞽史知天道者

宴居有師工之誦

師工樂官

史不失書

史學書
史者

矇不失誦

矇謂
替矇

以訓御之於是乎作

懿戒以自儆已

懿戒即今
抑詩也

及其沒也謂之獻聖武公

臣按衛武公之所以約敕其身者可謂至矣自卿

以下無一人不使任箴規之職自在與以下無一

處不欲聞箴規之言猶且作抑詩使人誦之不離

其側如是而意不誠心不正者未之有也惟能如

此故生有令名歿有美諡後之人主尚其法諸

孔子觀於魯廟有敬器焉孔子曰吾聞古之敬器者虛

則欹中則正滿則覆顧謂弟子挹水而注之中而正滿而覆虛而欹孔子喟然歎曰吁惡有滿而不覆者哉子路曰敢問持滿有道乎孔子曰聰明聖知守之以愚功被天下守之以讓勇力振世守之以怯富有四海守之以謙此所謂挹而損之之道也

臣按欹器古之遺法自三皇五帝有之所謂宥坐之器也天下之理至于中而止故列聖相傳以中為大法而制器亦象焉虛而欹不及也滿而覆過

也過與不及均為非中惟中則正矣斯器曰陳于前是亦几杖有銘之意也孔子因之以陳持滿之戒使人知挹損之道富哉言乎

孔子觀周入后稷之廟右階之前有金人焉三緘其口而銘其背曰古之慎言人也戒之哉無多言無多事多言多敗多事多害安樂必誠無行所悔勿謂何傷其禍將長勿謂何害其禍將大勿謂不聞神將伺人焰焰弗滅炎炎若何涓涓不壅終為江河綿綿不絕或成網羅

毫末不扎將尋斧柯誠能慎之福之根也曰是何傷禍
之門也強梁者不得其死好勝者必遇其敵盜憎主人
民怨其上君子知天下之不可上也故下之知衆人之
不可先也故後之江海雖左長於百川以其卑也天道
無親常與善人戒之哉戒之哉孔子既讀斯文也顧謂
弟子曰小子志之此言實而中情而信詩云戰戰兢兢
如臨深淵如履薄冰行身如此豈口過患哉言無口過
之可憂也
臣按斯文大畧與武王諸銘相出入必古之遺言

也孔子因是而發臨深履薄之言人主誠能誦之
於口志之於心而書之宥坐以自警亦進德之一

助云

唐穆宗問開元治道最盛何致而然宰相崔植對曰玄
宗即位得姚崇宋璟此二人蚤夜孜孜納君於道璟嘗
手寫尚書無逸為圖以獻勸帝出入觀省以自戒其
後朽暗乃代以山水圖稍怠于勤左右不復箴規姦
臣日用事以至于敗今願陛下以為元龜則天下幸

甚


臣按無逸一書萬世之著龜也宋璟手寫為圖以獻可謂有志於正君矣今經筵所在每設此圖庶幾開元故事然必玩而繹之如姬公之在前宋璟之在後惕然自省不敢暇逸然後此圖能為進德之助不然則視山水之繪其與幾何惟聖明其深念之

以上論規警箴誠之助臣聞程頤有言古之

人耳之於樂目之於禮左右起居盤盂几杖
有銘有戒動息皆有所養今皆廢此獨有理
義之養心耳但存此涵養意久將自熟敬以
直內是涵養意順之意蓋欲學者敬以自持
而內自直雖無禮樂銘戒之助可也然以學
者言之則今之所無固未易復以人君言之則
亦何所欲而不可耶誠能內主乎敬而凡古
人所以自警之具如湯武之銘筆之翰墨設

之屏幃可也使人諷誦入耳著心可也燕閒
永日毋深居中禁而時御使朝使儒臣環侍
迭陳規益如衛武公之自警可也魯廟之器
倣而為之設于宥坐以致滿盈之誠可也不
寧惟是宮庭宴樂以古者獻酬之禮而易今
之舉觴命醕以古者房中之樂如周南召南是也而
代今之樂府歌辭惟所欲為孰曰不可內外
交養動靜弗違而意不誠心不正者未之聞

也臣敢昧死以為聖明之獻



大學衍義卷三十

欽定四庫全書

子部

大學衍義卷三十一至
三

詳校官中書_臣孫球

刑部郎中_臣許兆椿覆勘

總校官降調編修_臣倉聖脉

校對官編修_臣汪學奎

謄錄監生_臣陳裕昆

欽定四庫全書

大學衍義卷三十一

宋 真德秀 撰

誠意正心之要二

戒逸欲

逸欲之戒

書益曰吁

戒

戒哉傲戒無虞

虞

度

罔失法度罔遊于逸

罔淫于樂任賢勿貳去邪勿疑疑謀勿成百志惟熙

熙

也明

罔違道以干百姓之譽

違背也
干求也

罔拂百姓以從己

之欲

拂違也

無怠無荒四夷來王

臣按此蓋戒舜之辭也既吁而後戒又申之以儆
戒深言治安無虞之世可畏而不可恃也夫治安
之世易失者法度易縱者逸樂故首言之若任賢
之不可不專去邪之不可不果謀事未合於理之
不可成與夫違道以求名拂衆以徇欲皆枚數而
告戒之而終之曰無怠無荒四夷來王蓋治亂之

源在人主之一心能守法度不縱逸樂則其心正
矣然後於人之賢否知所用舍謀之是非知所決
擇心志洞然無一蔽惑則於逆理逞欲之事自不
肯為又以常憂勤常兢畏而不以怠荒間之然後
中國尊而四夷服其效有不可揜者蓋之進戒始
於君心而終於君心此自古聖賢傳授之要法也
晉武帝混一天下唐明皇身致太平皆以逸樂怠
荒召戎狄之釁其流禍至於數百年然後知聖賢

之言為萬世之著策其可忽諸

臯陶曰無教逸欲有邦

臣按此臯陶戒舜之辭逸謂燕安怠惰之私欲謂奢靡荒淫之好人主一身天下之表倡也故當以勤儉而率諸侯不可以逸欲教有邦夫所謂教者非昭然示人以意嚮也逸欲之念少萌于中則天下從風而靡矣此臯陶所以惓惓也

禹曰無若丹朱傲

丹朱克于不肖

惟慢遊是好傲虐是作罔晝

夜頌頌

貌傲虐

罔水行舟朋淫于家用殄厥世

殄絕也

予創

若時

創懲也

娶于塗山

國名

辛壬癸甲

辛日娶妻甲日復出治水

啓呱呱

而泣

啓禹子

予弗子唯荒度土功

荒大也

臣按此大禹戒舜之辭丹朱之不肖其惡多端禹獨以傲之一辭斷之傲者驕怠之謂此衆慝之源也故所好者慢游所作者傲虐不分晝夜而肆其頌頌之狀無水而强行舟羣淫而亂家政所以殄絕其世也禹以敬戒之心懲其若此是以有室而

弗遑居有子而不暇愛獨於平土之功不敢後焉
朱惟驕怠是以騁欲禹惟敬戒是以忘私其言之
於舜亦以戒舜也夫舜以大聖之資安有可戒之
事而益以怠荒戒臯以逸欲戒禹又以傲虐戒豈
憂其有是而豫防之邪抑知其無是而姑為是言
邪人心惟危自昔所畏雖聖主不敢忘操存之功
大臣事聖主不敢廢規儆之益後之君臣宜視以
為法

太康失邦

夏后氏也

昆弟五人須于洛之汭作五子之歌其

二曰訓有之內作色荒外作禽荒甘酒嗜音峻宇雕牆

有一于此未或不亡

臣按大禹之訓凡六言二十有四字爾而古今亂亡之釁靡不由之凜乎其不可犯也古詩之體實原乎此意者大禹為之使子孫誦而傳之乎為人主者以此大訓揭之坐隅銘之楹席若古聖人儼臨乎前則保國之金湯全生之藥石也

仲虺之誥

仲虺作此以告成湯

惟王不邇聲色不殖貨利

王謂成湯邇近也殖

也生德懋懋官

懋勉也

功懋懋賞用人惟已改過不吝

臣按淫聲美色者迷心之鴆毒故湯弗邇之珍貨厚利者害義之稂莠故湯弗殖之人欲消亡天理昭著是以勉於德者必勉之以官勉於功者必勉之以賞用人之善由已之善已有不善則改而從善公平正大卓犖明白其原皆自不邇不殖始然則人主之心其可使有一毫物欲之累哉

伊尹作伊訓

訓太甲也

曰嗚呼先王肇修人紀

肇始也

從諫弗

咈

咈違

先民時若

先民猶言古人時是也若順也

居上克明為下克忠

為去

聲

與人不求備檢身若不及

檢為約飭也

以至于有萬邦茲

惟艱哉敷求哲人

敷廣也哲人賢哲之人

俾輔于爾後嗣制官刑

敝于有位

敝也

曰敢有恒舞于宮酣歌于室時謂巫風

敢有殉于貨色恒于遊畋時謂淫風敢有侮聖言逆忠

直達耆德比頑童時謂亂風惟茲三風十愆卿士有一

于身家必喪邦君有一于身國必亡臣下不匡其刑墨

匡正

也墨者貪以
敗官之刑

具訓于蒙士

蒙童

嗚呼嗣王祗厥身念哉

聖謨洋洋嘉言孔彰惟上帝不常作善降之百祥作不
善降之百殃爾惟德罔小萬邦惟慶爾惟不德罔大墜
厥宗

臣按伊尹先言成湯所以治已者而後述其所以治
人者此身教之義也蓋自夏桀之亂綱常掃地湯
始修而正之惟忠諫是從惟先民是順居上則能
明其德為民則能盡其心恕以及人故不求其備

嚴以律身故如恐弗及積行累善如此以至于有
天下其惟難哉成湯念得之之難懼保之之不易
也於是廣求賢哲以輔後人又制官刑以儆有位
蓋將維持王業於無窮也巫歌舞以樂神者也故
恒舞于宮酣歌于室是為巫覡之風殉猶殉葬之殉
陷身于貨色之中不知省悟又恒于畋獵不知止
息是為淫佚之風侮嫚聖人之言違拂忠直之士
踈遠耆艾之德親比頑嚚之童是為悖亂之風三

風其綱而十愆其目也卿士有其一家必喪諸侯
有其一國必亡臣下不能諫正者繩以敗官之罪
其刑墨童蒙之士則以此訓之夫自卿士以至諸
侯或蹈其一猶必取喪亡之禍況天子乎故伊尹
以此訓太甲欲其敬厥身而念之不忘也愆雖有
十苟能敬則十者俱泯一不敬則十者俱生故敬
之一辭乃治三風砭十愆之藥石也篇將終又深歎
聖言彰明與天命之難保以警動太甲之心冀其

必聽真所謂社稷之臣與

武王克商遂通道于九夷八蠻西旅底貢厥獫狁

西戎達國底致

也犬高四尺曰獫狁

太保乃作旅獫狁

太保三公之官召公奭也

曰嗚呼明王慎

德四夷咸賓無有遠邇畢獻方物惟服食器用王乃昭

德之致于異姓之邦無替厥服分寶玉于伯叔之國時

庸展親

庸用也展布也

人不易物

易讀如輕易之易

惟德其物德盛不

狎侮狎侮君子罔以盡人心狎侮小人罔以盡其力不

役耳目百度惟貞玩人喪德

玩者戲狎之謂

玩物喪志志以道

寧言以道接不作無益害有益功乃成不貴異物賤用
物民乃足犬馬非其土性不畜珍禽奇獸不育于國不
寶遠物則遠人格所寶惟賢則邇人安嗚呼夙夜罔或
不勤不矜細行矜謹也終累大德為山九仞八尺曰仞功虧一

簣

簣取土器

允迪茲生民保厥居惟乃世王

臣按西旅獻獒而未受也召公已作書戒王古者
人臣之格君心皆於過失未形之際不待已形而
後言也夫明王敬謹其德豈欲四夷之我賓哉而

賓貢乃有不求自至者然其所獻不過服食器用而已無它玩好也王乃以其物錫異姓之諸侯以示德之所致俾無廢其所職若寶玉則分于同姓之國以布親親之恩於是人不以物視物而以德視物受其賜者無敢慢易而各思勉其德焉夫有德者必敬敬則不狎侮若狎侮君子則君子去之無以盡其心狎侮小人則小人怨之無以盡其力召公先言慎德至此又以狎侮為戒蓋不敬乃敗德之源故也物之誘

人因視聽而入目悅色耳悅聲苟非心有所主未有不反為耳目所役者故必使耳目聽命於心而後可也心得其職則百度正猶官得其人而庶事修也玩人喪德即上文所謂狎侮也玩物喪志即上文所謂役耳目也玩人則以人為戲輕薄嫚易未有不喪其德者玩物則以物為戲荒縱淫佚未有不喪其志者然則何以寧其志曰道而已道者人心之正理以道養心則物欲不作而恬愉安平是之謂寧衆多之言交

至吾前何以應之曰道為權是非當否折之以理
雖有諛淫邪遁其能遷乎舜以危微精一告禹繼
之曰無稽之言勿聽此内外交養之方也召公之
意其在於是世之人主於有益之事多不肯為而
惟無益者是為故心志分而功不成於有用之物
多不知貴而惟無用者是貴故征求多而民不足
惟知本務實者不然工商之巧不如農桑之朴錦
繡之奢不如布帛之溫推類而言莫不然也小駟

乘而晉師以敗非土性也

晉惠公與秦人戰乘小
驍鄭出也故敗見獲於

秦事見
左傳

白狼入而荒服不至好珍奇也

周穆王伐
犬戎得白

狼白鹿以歸荒服
遂不至事見國語

千里馬之却漢文所以有道

事見

後聞鳴之求魏氏所以不長

魏文帝喪服未除遣使於
孫權求聞鳴事見三國志

齊

不寶徑寸珠而寶檀子敵以畏楚不寶白珩而寶觀射父國

以強凡此皆後世事而召公之言無一不驗者此

其所以為聖賢與篇將終又歎息而言蚤夜無或

不勤前言慎德欲其不嫚此言勤欲其不急慎者

嫚之反也勤者怠之反也人主能慎而不嫚能勤而不怠其事畢矣行者德之積微者鉅之積一行不慎全德之累微者少忽鉅者不成又以為山譬之九仞之功虧於一簣不可也萬年之業隳於一旦其可乎苟能信蹈乎茲則生民安其居民生安則王業永矣夫以武王之聖而召公戒之勤勤懃懃至於如此後世人主其可以己德為既足而厭規切之論乎

周公作無逸

作此以成王

曰嗚呼君子所其無逸

所猶居也

先知

稼穡之艱難

種曰稼成曰穡

乃逸則知小人之依

依謂小人所恃以爲生也

相小人厥父母勤勞稼穡

相視也

厥子乃不知稼穡之艱

難乃逸乃諺

諺語也

既誕

誕妄言也

否則侮厥父母曰昔之人

無聞知

昔之人指父母也

周公曰嗚呼我聞曰昔在殷王中宗

即商太戊也

嚴恭寅畏

四者皆敬也

天命自度治民祇懼不敢荒

寧肆中宗之享國七十有五年其在高宗時舊勞于外

爰暨小人

暨及也高宗爲太子時父小乙今居民間習民事

作其即位

作起也

乃

或亮陰三年不言

亮信也
陰默也

其惟不言言乃雍

雍和也

不敢

荒寧嘉靖殷邦至于小大無時或怨肆高宗之享國五

十有九年其在祖甲不義惟王舊為小人作其即位爰

知小人之依能保惠于庶民

保安也
惠愛也

不敢侮鰥寡肆祖甲

之享國三十有三年自時厥後立王生則逸

謂商之
後王也

生

則逸不知稼穡之艱難不聞小人之勞惟耽樂之從自

時厥後亦罔或克壽或十年或七八年或五六年或四

三年周公曰嗚呼厥亦惟我周大王王季克自抑畏

抑
謙

也文王卑服即康功田功徽柔懿恭

徽美也懿亦美也

懷保小

民惠鮮鰥寡自朝至于日中昃不遑暇食用咸和萬民

文王不敢盤于遊田

盤樂也

以庶邦惟正之供

供貢也

文王

受命惟中身厥享國五十年周公曰嗚呼繼自今嗣王

則其無淫于觀于逸于遊于田

淫過也

以萬民惟正之供無

皇曰今日耽樂乃非民攸訓非天攸若時人王則有愆
無若殷王受之迷亂酗于酒德哉

臣按呂祖謙曰天行健君子以自強不息無逸者

天德也亦君德也君子所其無逸者凡人乍勤乍
惰蓋亦有無逸之時然能暫而不能居非所其無
逸者也惟君子以無逸為所如魚之於水獸之於
林有不可離者焉或慕而為之或勉而行之皆非
所其無逸其視乾健不息之體猶二物也先知稼
穡之艱難乃逸則知小人之依此非始於憂勤終
於逸樂之論也蓋言備嘗稼穡之艱難乃處於安
逸則深知小人之所依依者小民所恃以為生者

也未嘗知稼穡之艱難而遂處安逸興一宮室起一力役視之若易然而民有不得其死者矣成王生於深宮而遽處人上周公深為之懼故以此言警之若以始勤終逸釋之是乾健之體有時而息矣後世漸不克終之患未必非此論啓之也相厥小人以下蓋引閭里近事明之也乃逸者縱逸自恣也乃諺者縱逸則所習者下委巷謠諺常誦於口也既誕者長惡不悛遂至於誕妄也若非誕妄

則必訕侮其父母曰昔之人無聞知自以為黠而反以老成為愚也劉裕奮畝農畝而取江左一再傳之後子孫見其服用反笑曰田舍翁得此亦過此所謂昔之人無聞知者也以成王之中材向使管蔡得志日夜扇惑戕賊之安知其不以后稷公劉為田舍翁乎臣謂厥子乃不知稼穡之艱難而遽處安逸所以誕妄侮厥父母餘則祖謙盡之祖謙又曰此舉無逸之君以告成王歎息而謂之我聞

蓋其語有所自來欲成王敬聽之也嚴則謹重恭則降下寅則肅莊畏則兢業合而言之則敬而已矣天命自度言中宗常以天命自律也維天之命存於心流行於天下著見於稷象內體道心之微外觀天下之公仰因稷象之示參驗省察不違其則所謂以天命自律也因桑穀之變而修省此則天命自度之一端耳治民祇懼不敢荒寧天人一理既畏天命必不敢輕下民中宗之敬則然矣所

以享國七十有五年何也惟敬故壽也主靜則悠
遠博厚自強則堅實精明操存則血氣循軌而不
亂收斂則精神內守而不浮至於檢約克治去戕
賊之累又不在言凡此皆敬之方而壽之理也自
此而下至于文王皆眉壽無有害者莫非此理也
孔子言仁者壽仁其體敬其功與無逸互相發也
無時或怨則非特不怨蓋無怨之根矣高宗之所
以壽固無異於中宗然言享國五十九年於小大

無時或怨之後蓋民氣大和導迎善氣是亦壽考之理又發此意以深勸成王下章論文王之咸和萬民亦此意也

臣按舊說以祖甲為太甲考諸史記祖甲者高宗之子祖庚之弟也鄭玄曰高宗欲廢祖庚立祖甲祖甲以為不義逃於民間與不義惟王之說叶而以邵雍書參之祖甲享國三十有三年世次又正在高宗之後故知非太甲也

蘇軾曰人莫不好逸欲而所甚好者生也以其所甚好而禁其所好庶幾必信此無逸之所為作也然猶有不信者以逸欲為未必害生也漢武帝唐明皇豈無欲者哉而壽乃如彼夫多欲不享國者皆是也漢武明皇千一而已飲飢食野葛者必死而曹操獨不死亦可效乎呂祖謙又曰商周猶異世也文王親成王之祖也故復舉文王之無逸以告成王言愈近而意愈切矣厥亦云云者將論文王無逸先言淵源之所自也凡有血氣每

患於上陵學問之道無他下之而已矣損抑祇畏所以下之也太王王季所以克自抑畏則其用力於無逸者深矣是乃文王無逸之淵源文王則由父祖之抑畏而至於作聖者也文王卑服即康功田功者言其自奉之薄而專意於安養斯民耳卑服蓋舉一端宮室飲食自奉之薄皆可推也物莫能兩大厚於奉己必薄於恤民文王於衣服自奉之屬所性不存漠然未嘗留意也則其力果安用

哉即於康功以安民即於田功以養民而已力不分
於奉已故功全歸於恤民也徽柔柔之徽美者也懿
恭恭之淵懿者也凡人柔巽謹愿不謂之柔恭不可
也其視徽柔懿恭意味光輝則大不同矣於民言小
者蓋匹夫匹婦未被其澤則其保猶未周也於鰥寡
而言惠鮮者鰥寡窮民垂首喪氣文王惠綏之莫不
鮮鮮然有生意也當是時紂方在上毒痛四海文王
處方伯之位而欲咸和其民曷乎有杯水勝火之難

推望道未之見之心勤而且勞自應至是也然亦豈
若後世量書傳餐代有司之任者哉立政言罔攸兼
于庶言庶獄庶慎則所謂不遑暇食者其勤勞必有
在矣讀無逸則見文王之勞讀立政則見文王之逸
豈相為矛盾者哉於至勞之中有至逸於至逸之中
有至勞也遊田國有常制至於盤于遊田則以是為
耽樂固文王之所不為也不曰不為而曰不敢者翼
翼之小心也以遊畋之簡則可知其用之約既無橫費

自無過取所以庶邦之貢於文王者於正數之外無一毫之加也文王為西伯所統之庶邦蓋有常供其在春秋諸侯貢於伯主者班班可見此章論文王之家法故凡無逸之條目如崇儉素重農畝恤窮困勤政事戒佚游損橫斂大略皆備其稱文王之壽即前章之意以此坊民後世猶有妄為文王憂勤損壽之說以啓人主之好逸者

又曰無逸雖戒成王實欲後世子孫共守此訓故以

繼自今嗣王言之觀覽以舒其目安逸以休其身遊
豫以省風俗田獵以習武備此人君所不能無也特
不可過而已過則人欲肆而浸入于亂亡矣故周公
之戒嗣王不使之無觀逸遊田而使無淫於觀逸遊
田淫謂過也苟必欲絕之使無則迫蹙拘制鬱而不
伸非所以養德也前稱文王此戒嗣王皆先言簡遊
田而繼以惟正之供蓋欲禁橫斂必先絕橫斂之源
也淫于四者侈費無度其勢不得不橫斂四者既省

用有常經自應以萬民惟正之供也九貢九賦什一之制皆名正義順天下之中制過是則害於理財正辭之義也人之始耽樂者每自恕曰吾惟今日耽樂一日放逸所害幾何抑不知是心一流則自一日而至于二日自二日至于終身不反也故周公先塞其源戒之以無敢皇暇曰今日耽樂下無以示民而非民攸訓上無以順天而非天攸若可謂有莫大之愆而非小失也一日耽樂周公禁之如此其嚴蓋人主

不可使知耽樂之味苟開其一日之樂以為無傷逮其既嘗此味則寢深寢溺矣

臣按無逸一書前舉三宗後舉文王俾成王知所以法又舉商王受俾成王知所以戒受之惡無所不有而酗于酒其最也人無智愚皆知憂勤者必享國而逸欲者必戕生惟其沉湎于酒心志昏亂則雖死亡在前亦不知畏故欲無逸則不可酗酒酒則不能無逸此周公所以專於陳戒與

孟子曰國家閒暇及是時明其政刑雖大國必畏之矣

詩云

鸛鳴
之篇

迨天之未陰雨徹彼桑土

徹取也桑土
桑根之皮也

綢

繆牖戶

綢繆繆
補葺也

今此下民或敢侮予孔子曰為此詩

者其知道乎能治其國家誰敢侮之今國家閒暇及是時般樂怠傲是自求禍也禍福無不自已求之者

臣按孟子引鸛鳴之詩以為彼羽毛微類而能於未雨之時豫為之備如此今國家閒暇不能修明政刑顧乃翫細娛而忘大患可乎昔人有言燕雀

處堂母子相安自以為樂也突決棟焚而母子恬然不知禍之將及是燕雀之智不如鴟鶚遠矣為國者必能憂勤兢畏以圖安而不為盤樂怠傲以自禍庶幾免於燕雀之譏乎

梁王觴諸侯於范臺

臺名

酒酣請魯君舉觴魯君興避席

擇言曰昔者帝女令儀狄作酒而美進之禹禹飲而甘之遂疏儀狄絕甘酒曰後世必有以酒亡其國者齊桓公夜半不噉

噉飽也

易牙乃煎熬燔炙和調五味而進之

桓公食之而飽至旦不覺曰後世必有以味亡其國者

晉文公得南之威

美婦人也

三日不聽朝遂推南之威而遠

之曰後世必有以色亡其國者楚王

莊王

登強臺

臺名

左

江而右湖其樂忘死遂盟強臺而弗登曰後世必有以

高臺陂池亡其國者今主君之尊儀狄之酒也主君之

味易牙之調也左白台

音怡

而右閭須

白台閭須皆美婦人

南威之

美也前夾林而後蘭臺

夾林蘭臺皆臺榭名

強臺之樂也兼此四

者可無戒與梁王稱善相屬

臣按四者之欲人之所同惟聖賢則能以道勝欲故大禹絕旨酒而不御晉文推南威而遠之楚莊盟強臺而不登晉楚之君雖未可與大禹同年而語其勇於自克亦可尚也齊桓雖知厚味之亡國而寵任易牙至於終身卒以召亂是自言之而自蹈之也物欲之伐人至為可畏惟人主一以大禹為師推惡酒之心以御羣物而深戒齊桓之不勇其庶幾乎

唐太宗時張蘊古上大寶箴曰樂不可極樂極生哀欲不可縱縱欲成災壯九重於內所居不過容膝彼昏不知瑤其臺而瓊其室羅八珍於前所食不過適口惟狂罔念丘其糟而池其酒勿內荒於色勿外荒於禽勿貴難得貨勿聽亡國音內荒伐人性外荒蕩人心難得之貨侈亡國之音淫

臣按大寶之箴亦丹扆之良規也故剏音取其畧以備覽觀焉

以上總論逸欲之戒

大學衍義卷三十一

欽定四庫全書

大學衍義卷三十二

宋 真德秀 撰

誠意正心之要

戒逸欲

沉湎之戒

微子

商書篇名

父師

其子

若曰天毒降災荒殷邦方興沉酗于

酒

沉謂溺于酒
酗謂醉而怒

臣按酗酒者受也而箕子乃歸之於天蓋忠臣不忍斥其君故為無所歸咎之辭也

泰誓

武王伐紂誓師之辭

今商王受弗敬上天降災下民沉湎冒

色

冒亂也

敢行暴虐罪人以族官人以世惟宮室臺榭陂

池侈服以殘害于爾萬姓又曰淫酗肆虐臣下化之

臣接受之惡衆矣而武王誓衆乃以沉湎為首者人惟一心明則萬善所從出昏則衆惡所自生未有沉溺于酒而志不愾者志一愾則無所不有矣

故曰冒色曰暴虐曰宮室臺榭陂池侈服無不具
焉宜武王以為問罪之首也夫成湯惟其不邇聲
色也故德懋懋官功懋懋賞受惟其沉湎冒色也
故罪人以族官人以世心有愷明之異故政有得失
之殊後之人主其可不鑑

酒誥王若曰明大命于妹邦

妹邦紂故都也

乃穆考文王

穆故也

肇國在西土

肇始也

厥誥毖庶邦庶士越少正御事

誥告也

也朝夕曰祀茲酒惟天降命肇我民惟元祀

元大也

天降

威我民用大亂喪德亦罔非酒惟行

行音幸

越小大邦用

喪亦罔非酒惟辜

辜罪也

文王告教小子有正有事

有正有官

守者有事有職業者

無彛酒越燕國飲惟祀德將無醉惟曰我民

迪小子

迪訓導也

惟土物愛厥心臧

臧善也

聰聽祖考之彛訓

越小大德小子惟一王曰封我西土棐徂邦君御事小

子

棐輔也徂往也

尚克用文王教不腆于酒

腆厚也

故我至于今

克受殷之命王曰封我聞惟曰在昔殷先哲王

哲王謂成湯

迪畏天顯小民

迪蹈也

經德秉哲

經常也秉執也

自成湯咸至于

帝乙

帝乙商之後王

成王畏相

成就也

惟御事厥業有恭

御事治事也

不敢自暇自逸矧曰其敢崇飲

矧況也

越在外服侯甸男

衛邦伯越在內服百僚庶尹惟亞惟服宗工越百姓里

居罔敢湏于酒不惟不敢亦不暇惟助成王德顯越尹

人祗辟

尹人者師尹也祗敬也辟君也

我聞亦惟曰在今後嗣王酣身

後王謂商紂

厥命罔顯于民祗保越怨不易

易改也

誕惟厥縱

淫泆于非彛

誕大也泆蕩也

用燕喪威儀

燕謂飲宴喪亡也

民罔不盡

傷心

盡痛也

惟荒腆于酒不惟自息乃逸厥心疾很不克

畏死辜在商邑越殷國滅無罹

罪憂也

弗惟德馨香祀登

聞于天誕惟民怨庶羣自酒腥聞在上故天降喪于殷
罔愛于殷惟逸天非虐惟民自速辜

臣按商受淫酗臣民化之方文王之在西土已告
教在位者謹戒于酒矣及成王封康叔於衛衛受
之故都也漸染惟舊故作酒誥以訓敕之妹邦即
衛也成王之誥專為衛而作故云然也朝夕祀茲
酒言文王之告教諸侯而下至於治事之臣朝夕

丁寧惟祀則飲斯酒也天之始生黍稷俾民為酒
惟用之大祀而已非資其沉酗也及我民以之喪
德諸侯以之喪邦無不自斯酒始酒一也飲之有
度而受福則為天之降命飲之無度而受禍則為
天之降威觀小大邦用喪之言則當時以酒亡國
者衆矣惟行以酒為行也惟辜以酒為罪也文王
既教羣下勿常于酒又教之德將無醉凡飲酒能
以德自持則無酣醬音沐之過所謂不為酒困也民

蒙文王之化亦各訓迪子弟惟土地所生之物是
愛故其心臧蓋一溺於酒則必旁求珍異以自奉
其欲廣則其心蠹矣是時為子弟者亦各聰聽祖
考之常訓訓之常則入于耳者熟聽之聰則志於
心也恪故於小大之德視之惟一不以謹酒為小
焉謹酒非小德則腆酒非小過亦明矣夫有司之
不腆酒於天命何預而王乃以克受商命為職此
之由何邪但觀幽厲陳隋之朝上下沉酣以致墜

失天命則謹酒而受天命復何疑哉既又叙成湯之謹酒與後王之酣身為康叔戒蓋湯上畏天下畏民常其德而不變秉其智而不惑自是至于帝乙皆以成君德敬輔相為心而治事之臣亦各盡輔翼之敬雖自暇自逸且猶不敢況曰崇飲乎崇飲謂相尚以飲也是時內外大小之臣無敢湏于酒者不惟稟上之教不敢違亦以職守所在不暇為不敢猶見勉強不暇則安之矣職守謂何上以

助成君德之顯明下以助大臣之祇辟也一時羣臣以此自勵雖欲不興得乎及受沉酣其身命令不著于民惟作怨之事是守惟淫佚非彛是縱安燕以喪其威儀考之史記受為酒池肉林使男女裸而相逐其威儀之喪如此民所以痛傷其心悼國之將亡也而紂方且荒腆于酒逸欲不息其心疾很雖殺身而不畏也罪在商邑雖滅國而不憂也觀今之小人一醉之餘急疾强很水火可入兵

刃可蹈則受之情狀可知矣馨德者穢德之對也
紂夷居弗事上帝既無馨香以祀而作怨于民羣
酗于酒惟有腥穢上聞于天天之喪商無復眷愛
之意者以受自放于逸故也天豈虐商者哉以商
人自速其辜耳此書言沉湎之禍至深至切豈惟
康叔敬守弗渝萬世人君皆當視為龜鑑

蕩

召穆公作以刺周厲王穆公名虎

其五章曰文王曰咨咨女殷商天

不湎爾以酒不義從式

式用也

既愆爾止

止容止也

靡明靡晦

式號式呼俾晝作夜

臣按召公知厲王之將亡故為此詩託於文王所以咨嗟商紂者以諷王言天不使爾沉湎于酒而惟不義是從是用也既愆爾止而下皆譏其飲酒無度之狀天付人君以位豈欲爾如此哉不使爾為而為之是逆天也儻厲王聞而知警言其庶幾乎小宛大夫刺幽王也其二章曰人之齊聖

齊肅也

飲酒溫

克

克勝也

彼昏不知壹醉日富各敬爾儀天命不又

又再也

臣按此詩言齊聖之人雖飲酒猶溫恭自持以勝所謂德將無醉也彼昏然而不知者則一於醉而日甚矣於是言各敬謹爾之威儀天命已去將不復來不可以不恐懼也時幽王以酒喪德大夫恐淪胥以敗與其同列自相規戒如此云

賓之初筵衛武公刺時也幽王荒廢嬖近小人

也 媒押

飲

酒無度天下化之君臣上下沉湎淫液武公既入而作是詩其三章曰賓之初筵溫溫其恭其未醉止威儀反

反

反反言重謹也
云反反顧禮也

一

曰既醉止威儀幡幡

幡幡輕
數也

舍其

坐遷屢舞僂僂

僂僂軒
來之狀

其未醉止威儀抑抑

抑抑謹
密也

曰

既醉止威儀忼忼

忼忼嫌
慢也

是曰既醉不知其秩

秩序

四

章曰賓既醉止載號載嘯

號呼也
嘯謂也

亂我籩豆屢舞僂僂

僂僂

傾側
之貌

是曰既醉不知其郵

郵過
也

側弁之俄

側傾也弁冠
也俄傾貌

屢舞僂僂

僂僂不止也臣謂
僂僂者蹉跌之狀

既醉而出並受其福醉而不

出是謂伐德飲酒孔嘉

孔甚也
嘉美也

維其令儀

令善
也

五章曰凡

此飲酒或醉或否既立之監或佐之史彼醉不臧不醉

反耻式勿從謂母俾大

音泰

怠匪言勿言匪由勿語由醉

之言俾出童羖

童無角羖羊也

三爵不識矧敢多又

臣按此詩凡五章前二者言古者禮飲之事至三章以後乃言幽王酣飲之失方其未醉也威儀猶能敬謹猶能周密及其既醉則幡幡然而輕矣怩怩然而嫚矣舍其坐遷矣載號載呶矣籩豆亂而冠弁俄矣至於屢舞不止始則僊僊然而軒舉次則僊僊然而傾側甚則傴傴然而蹉跌矣君臣燕

饗之間所以觀禮而乃媒瀆如此則諉之曰是既醉而失其常也既醉而不知其過也然既醉矣何為而不出乎醉而出未至於失禮之甚則君臣猶俱受其福也醉而不出是戕伐其德為禍可勝計邪夫飲酒所以嘉美者以其有令儀也今乃若是儀安在乎末章傳者多異辭而先儒劉晏之說曰幽王飲酒必與羣衆小人男女罔間而立監命史俾臨視巡省在會之人罔得弗醉也衆醉而淫亂邪

惡百醜興焉而王用以為娛不醉者反恥而罰之
俾必醉衆皆醉矣淫亂邪惡無所不至幽王方以
為樂故立史監戒其勿言幸其昏迷大怠用以為
歡焉匪言勿言者厥有醉劇而才於淫穢巧于悖
亂匪可以言者則褒而美之用以為樂謹勿言其
非恐愧厥心而弗復肯焉故云匪言勿言也其醉
而善於悖亂違拂人倫之事謂之匪由由道也匪
由之人常常延納勿語于外留之以為吾王一笑

之歡也有敢道及醉人之非者罰以童殺殺無童者俾之必出所以因其不能謹言也是以有不得已而預其燕飲者心知其非而口不敢言又恥於其身亦為淫亂故三爵之後昏昏然醉矣不識不知矣矧敢多飲而又寤哉幽王繼宣王中興之後使為不道不若是之甚犬戎豈能殺之哉嗚呼禽獸之所弗為而幽王為之其滅亡乃自取之也呂祖謙謂彛於此章雖多牽強忿激然論酗酒之害

深切詳明故錄之臣今亦有取焉庶以為方來之

監云

抑

大雅篇名

衛武公自警也三章曰其在于今興迷亂于政

顛覆厥德荒耽于酒女雖湛樂從

汝者武公自謂

弗念厥紹

紹繼

也

罔敷求先王克共

晉恭

明刑

刑法也

臣按此武公自言今日之所為也興猶書所謂方興言為之未已也汝雖惟耽樂是從曾不念紹續之重廣求先王之道而敬奉其明法乎蓋先王之

明法未有不以耽樂為戒者能敬奉之則不為荒縱之行矣

漢成帝嘗與張放等宴飲禁中皆引滿舉白談笑大噱時乘輿幄坐屏風畫紂醉踞姐已作長夜之樂侍中班伯久疾新起上顧指畫而問曰紂為無道至於是乎對曰書云乃用婦人之言何有踞肆於朝所謂衆惡歸之不如是之甚者也上曰苟不若此此圖何戒對曰沉湎于酒微子所以告去也式號式呼大雅所以流連也詩書

淫亂之戒其原皆在于酒上乃喟然歎曰吾久不見
班生今日復聞讜言放等不憚稍自引起更衣因罷
去

臣按班伯曰詩書淫亂之戒其原皆在于酒直哉
言乎成帝能嗟嘆之而不能因其言以自改卒以
沈湎妨政權移外家至于覆國其亦可監也夫

晉元帝初頗以酒廢事王導以為言帝命酌引觴覆之
於此遂罷

臣按元帝之為君非能剛果必為者也其覆杯之舉則于聽言改過而畧不凝滯此所以粗能自立于江左歟

陳後主君臣酣飲自夕達旦以此為常其後隋師東下不為深備奏技縱酒賦詩不輟陳國遂亡

隋煬帝至江都荒淫益甚宮中為百餘房各盛供帳實以美人日令一房為主帝與蕭后及幸姬歷就宴飲酒卮不離口從姬千餘人亦常醉未幾為宇文化及所弑

臣按以酒喪邦其禍至陳隋而極故以二君終焉
以上論沉湎之戒

大學衍義卷三十二

欽定四庫全書

大學衍義卷三十三

宋 真德秀 撰

誠意正心之要二

戒逸欲

荒淫之戒

牧誓

武王誓師
牧野之辭

王曰古人有言曰牝雞無晨

牝雞也晨
鳴晨也

牝雞之晨惟家之索

索窮也

今商王受惟婦言是用

婦姐
已也

昏棄厥肆祀弗答

肆陳也
恭報也

昏棄厥遺王父母弟不迪

迪

也

乃惟四方之多罪逋逃是崇是長是信是使是以為

大夫卿士俾暴虐于百姓以姦宄于商邑

臣按列女傳受好酒淫樂不離姐已所舉者貴之所憎者誅之惟其言是用受之心既昏于色矣於是神祇當祀者不之祀昆弟當恤者不之恤而惟四方罪戾逋亡之人崇長信使俾之肆毒于民受病之本皆由昏之一字故武王兩言之

詩谷風

邶風篇名

刺夫婦失道也衛人化其上淫於新昏而

棄其舊室夫婦離絕國俗傷敗焉

宣姜有寵而夷姜繼是以其民化之而谷風之詩作

靜女

同上

刺時也衛君無道夫人無德

新臺

同上

刺衛宣公也納伋之妻作新臺于河上而要之國

人惡之而作是詩

二子乘舟思伋壽也衛宣公之二子爭相為死國人傷而思之

臣按毛氏曰宣公為伋取齊女而美公奪之生壽

與朔朔與其母總伋於公令伋之齊使賊先待於
隘而殺之壽知之以告伋使去之伋曰君命也不
可以逃壽竊其節而先往賊殺之伋至曰君命殺
我壽有何罪賊又殺之

牆有茨

御風
篇名

衛人刺其上也公子頑通乎君母國人疾

之而不可道也

宣公卒惠公幼其庶子頑通於
惠公之母惠公之母即宣姜也

君子偕老

同上

刺衛夫人也夫人淫亂失事君子之道

夫人

即宣
姜也

桑中

上同

刺奔也衛之公室淫亂男女相奔至于世族在

位相竊妻妾期於幽遠政散民流而不可止

鶉之奔奔

上同

刺衛宣姜也衛人以為宣姜鶉鵲之不若也

定之方中

上同

美衛文公也衛為狄所滅東徙渡河野

處漕邑齊桓公攘戎狄而封之

蝮螭

上同

止奔也衛文公能以道化其民淫奔之耻國人

不齒也

氓

衛風

刺時也宣公之時禮義消亡淫風大行男女無別

遂相奔誘華落色衰復相棄背

臣按邶鄘衛詩分為三國其實皆衛也衛宣公奪其子伋之妻而為夫人於是新臺之刺靜女之刺相繼而作因讒殺子而二子乘舟之詩作夫婦失道國人化之而谷風桑中氓之詩作宣公卒而公子頑上烝于宣姜而牆茨偕老鶉奔之詩又作再世而至懿公卒為狄人所滅而文公立焉定之方中與蝦螬之詩所由作也始末凡十餘詩而事

之次第蓋如此新臺之一章曰燕婉之求蘧篚不
鮮二章曰燕婉之求得此戚施蘧篚仰而不俯戚施俯
而不仰皆惡疾之不能為人者也燕婉指伋而言
謂其為人安且順也齊女之來本惟燕婉是求而
乃得此惡疾之宣公宣公本無疾也以其行之惡
故名之耳自是伋壽死而國俗敗子頑象之上烝
君母衛君父子之行皆同於夷狄衛國之俗亦淪
於夷狄安得夷狄之禍不乘之以作乎夫夷狄非

能滅中國也以中國自為夷狄而後夷狄得以肆焉
氣類之相感也求之古昔蓋莫不然原宣公之初
亦溺於情欲而不能制爾安知其禍若是之烈哉
然文公一興以道化民而淫奔之俗隨變信乎一
國之事繫一人之本也牆茨一章曰中冓之言不
可道也所可道也言之醜也二章曰不可詳也三
章曰不可讀也蓋淫荒穢褻汙人牙頰言之且不
可況可詳之讀之乎夫言猶不可聖人乃著之於

經何也善乎先儒揚時曰自古淫亂之君自謂密
於閨門之中世無得而知者故自肆而不反聖人
所以著之於經使後世為惡者知雖閨中之言亦
無隱而不彰也其為訓戒深矣故事國風之詩經
筵不講先儒胡安國非之臣今列此於篇者欲明
人君一以淫佚導其民則變華而狄一以道化迪
其民則變狄而華其機猶反掌爾若陳株林澤陂
等詩皆為淫昏而作其禍敗往往略同不能悉舉

也

晉獻公卜伐驪戎史蘇占之曰勝而不吉公不聽遂伐驪戎克之獲驪姬以歸有寵立以為夫人公飲大夫酒令司正實爵與史蘇曰飲而無肴

肴俎實也

夫驪戎之役汝

曰勝而不吉故賞汝以爵罰汝以無肴勝國得妃吉孰

大焉史蘇卒爵再拜稽首曰兆有之

卦兆

臣不敢蔽

蔽掩也

蔽兆之紀

紀法也

失臣之官有二臯焉何以事君大罰將

及不唯無肴抑君亦樂其吉而備其凶凶之無有備之

何害若具有之備之為瘳

瘳愈也

臣之不信國之福也

不信

卜不中也飲酒出史蘇告大夫曰夫有男戎必有女戎若晉

以男戎勝戎戎亦必以女戎勝晉里克曰何如史蘇曰

昔夏桀伐有施有施人以妹喜女焉

以女進人曰女

妹喜有寵

於是與伊尹比而亡夏

比猶合也

殷辛伐有蘇有蘇以妲己

女焉妲己有寵於是乎與膠鬲比而亡殷周幽王伐有

褒有褒人以褒姒女焉褒姒有寵生伯服於是乎逐太

子宜臼而立伯服太子出奔申申人召西戎以伐周周

於是乎亡今晉寡德而安侮女又增其寵雖當三季之王不亦可乎公以驪姬為夫人生奚齊其娣生卓子史蘇曰亂本生矣亂必自女戎三代皆然驪姬果作難

事見

前

臣按史蘇曰有男戎必有女戎斯言也古今之至言也然謂妹喜與伊尹比妲己與膠鬲比何邪伊尹相湯伐桀者也妹喜敗桀之德速桀之亡是亦伐之也伊尹伐於外妹喜伐於內故以比言之無

妹喜之伐則無伊尹之伐矣妲己之比膠鬲亦然
嗚呼人知有邊境之寇而不知有宮闈之寇堅甲
利兵獸奔豕突者邊境之寇也冶容妖色狐媚蠱
惑者宮闈之寇也邊境之寇擾吾於外膚革之疾
也宮闈之寇賊吾於內腹心之災也理膚革之疾
易而去腹心之災難臣故曰史蘇之言古今之至
言也

晉侯疾求醫於秦秦伯使醫和視之曰疾不可為也是

謂近女室疾如蠱

蠱惑也

非鬼非食惑以喪志良臣將死

天命不佑公曰女不可近乎曰節之陰淫寒疾陽淫熱

疾女陽物而晦時淫則生內熱惑蠱之疾今君不節不

時能無及此乎出告趙孟趙孟曰誰當良臣對曰主是

謂矣主相晉國無亂諸侯無闕可謂良矣和聞之國之大臣

榮其寵祿有菑禍興而無改焉必受其咎今君至於淫以生

疾將不能圖恤社稷禍孰大焉主不能禦

禦止也

吾是以云

鄭子產如晉問疾

子產鄭大夫名僑

叔向問之

叔向晉大夫

子產曰僑聞

之君子有四時朝以聽政晝以訪問夕以修令夜以安

身於是節宣其氣勿使有所壅閉湫底以露其體

露猶瘠也

茲心不爽

爽明也

而昏亂百度

百度百為之法度

今無乃壹之則

生疾矣僑又聞之內官不及同姓

內官謂嫡御也

男女辨姓禮

之大司也

司主也

今君內實有四姬焉

姬晉姓也

其無乃是也

乎若由是二者弗可為也四姬有省猶可

省減也

無則必

生疾也叔向曰善哉肸未之聞也

肸叔向名

臣按醫和子產之論略相表裏夫陰根於陽故女

為陽物人道以夕故曰晦時淫則生內熱感蠱之疾以其陽物故生內熱以其晦時故生感蠱此以陰陽之類言也要之心者一身之本衆疾之源淫於色則心為之荒惑其不生疾乎故子產曰茲心不爽而昏亂百度其論益精切矣然則醫和之責大臣何邪大臣之於君所以傳之德義而保其身體者也求之於古惟周公為能以此自任故無逸之作丁寧告戒無淫于逸使成王永其天命後世知

恤者鮮故以管仲而不能規六嬖之寵以趙武而
不能救四姬之惑夫二人者非姦非慝徒以昧於
大臣之職不能止君之淫猶不免責況以姦慝之
心導君於淫者其罪可逃誅哉子產之所謂四時
何也朝以聽政晝以訪問所以勞之也夕無所聽
修令而已夜無所訪安身而已所以逸之也動靜
有時勞逸有節疾焉從生觀安身之云則夜氣澄
寂之時尤當自養為朝聽晝訪之地其可惑溺無

節乎又況可以一之者乎一云者自蚤至夜惟欲
是從也內官不及同姓若是則異姓固無損與曰
此子產特因晉之有是故以規之爾妲己褒姒豈
同姓邪昔人論色禍者矣子產醫和所論尤人主
所當戒大臣所當任也故併著之

漢成帝趙皇后既立後寵少衰而弟絕幸為昭儀居昭
陽宮其中庭彤朱而殿上髹漆切皆銅沓冒黃金塗

切門限也

千結反沓冒其限也

白玉階

陸也

壁帶

壁上橫木

往往為黃金釭

音工

函藍

田璧明珠翠羽自後宮未嘗有焉姊弟要寵十餘年卒
皆無子掖庭中御幸生子者輒死又飲藥傷墮者無數
成帝素彊無疾暴崩民間歸罪昭儀皇太后詔雜治昭
儀昭儀自殺先是有童謠曰燕燕尾涎涎張公子時相
見木門倉琅根燕飛來啄皇孫皇孫死燕啄矢成帝每
微行出常與張放俱而稱富平侯家故曰張公子倉琅
根宮門銅鍰也

臣按昭儀之始入也姿質穠粹見者嗟賞獨宣帝

時披香博士淖方成

此老官嬪也為披香殿博士

立帝後唾之

曰此禍水也滅火必矣

漢火德也

其事見司馬光通鑑

云褒姒之亂史伯謂其生有龍漦之異歷弧箕服

之祥

國語

雖近怪然豔妻嬖女其非天地正氣所

生也必矣禍水之說近是故併附焉

唐玄宗貴妃楊氏始為壽王妃

壽王瑁玄宗子也

武惠妃薨後

庭無當帝意者或言妃姿質天挺宜充掖庭遂召納禁

中

臣按此即新臺之比也玄宗於是無復人理矣

異之即為自出妃意者焉籍

女官號太真更為壽王聘韋昭訓女而太真得幸善歌舞遂曉音律智筭警穎迎意輒悟帝大悅遂專房宴宮中號娘子儀體與皇后等進冊貴妃三姊皆美劬帝呼為姨封韓號秦三國為夫人出入宮掖恩寵聲焰震天下臺省州縣奉請托奔走期會過詔勅四方獻餉結納門若市然他日妃以譴還第比中是帝尚不御食答怒左右高力士知帝旨是夕請召妃還由是愈見寵妃每從游幸乘馬則力士授轡策凡充錦繡官及冶琢金玉

者大抵千人奉須索奇服秘玩變化若神四方爭為怪
珍入貢動駭耳目妃嗜荔枝必欲生致之乃置騎傳送
走數千里味未變已至京師每十月帝幸華清宮五宅
車騎皆從家別為隊一色俄五家隊合爛若萬花川谷
成錦繡國忠導以劍南旗節遺鈿隨烏瑟瑟璣琲狼藉于
道香聞數十里初安祿山有邊功帝寵之詔與諸媛約
為兄弟而祿山母事妃來朝必宴餞結歡妃嘗養祿山
為兒令宮人
以絲與昇之帝聞賜妃洗兒錢祿山在禁中
或通夕不出頗有醜聲聞于外帝不禁也及祿山反

以誅國忠為名且指言妃及諸嬖罪帝欲以皇太子撫
軍禪位諸楊大懼哭于庭國忠入白妃妃銜塊請死帝
意沮乃止及西辛至馬嵬陳玄禮等以天下計誅國忠已
死軍不解帝遣力士問故曰禍本尚在帝不得已與妃
訣引而去縊路祠下裹尸以紫茵瘞道側

史臣歐陽脩曰嗚呼女子之禍於人也甚矣唐自高

祖至于中宗再罹女禍

謂武韋
二后也

唐祚既絕而復續中

宗不免其身韋氏遂以族玄宗親平其亂可以為鑒

矣而又敗於女子方勵精政事開元之際幾至太平
何其盛也及侈心一動窮天下之欲不足為其樂而
溺其所甚愛忘其所可戒至於竄身失國而不悔考
其始終之異至於如此可不謹哉可不謹哉

胡寅曰天子之尊威制四海而不能庇一婦人何也
怨之所集禍之所起也明皇昏於楊妃凡十年以王
鉞為色役使併責三十年租庸歲供額外錢帛百億
以供宮中宴賜則毒遍天下矣楊國忠以疎族進薦

鮮于仲通帥劍南喪師二十萬人大開邊患則毒又
深於西南矣五楊請托府縣峻於制勅則毒又遍於
畿甸矣貴妃私於祿山以至反叛則毒又甚於兩河
矣一人三失怨豈在明猶當圖其所不見者沉怨塞
宇宙獨以貴妃一家之故夫何為猶憚其斃也自非
陳玄禮等勸以速殺則禍必及身矣

臣按後世淫泆之主溺於衽席之愛以召亂者衆
矣而漢飛燕唐太真最其著者焉傳曰夫有尤物

足以移人苟非德義則必有禍成帝明皇當承平
富庶之餘而忘持盈守成之戒志念所營惟在聲
色而尤物出妖姿蕩目狡謀銖心二君流連荒縱
自謂窮天下之樂而不知禍胎亂萌已伏於閨闈
中故燕啄皇孫國嗣絕載舁祿兒反謀決曾未幾
時而鼎祚移戚家兵塵暗宮闕矣色之為禍慘於
鏌鋣而烈於燎原之火大抵如此可不戒哉可不
懼哉

唐莊宗既好俳優又知音能度曲其小字亞子又別為
優名以自目曰李天下常身與俳優雜戲于庭伶人由
此用事以至於亡莊宗嘗與羣優戲四顧而呼曰李天
下李天下伶人敬新磨遽前批其頰莊宗失色羣伶亦
大驚駭新磨對曰李天下者一人而已尚誰呼邪於是
左右皆笑莊大喜賜與新磨甚厚時諸伶獨新磨尤善
俳而不聞其他過惡其敗國亂政者有景進史彥瓊郭
門高為最是時諸伶出入宮掖侮弄縉紳羣臣憤嫉莫

敢出氣或反相附託以希恩倖四方藩鎮貨賂公行而景進最居中用事莊宗遣進等出訪民間事無大小皆以聞每遇奏事殿中左右皆屏退軍機國政皆與參決莊宗初入洛居唐故宮室而嬪御未備閹官希旨多言宮中夜見鬼物相驚恐莊宗問所以禳之者因曰故唐時後宮萬人今空宮多怪當實以人乃息莊宗欣然其後幸鄴乃遣進等採鄴美女千人以充後宮而進等緣以為姦軍士妻女因而逃逸者數千人郭門高名從謙

門高其優名也雖以優進而嘗有軍功故以為從馬直
指揮使從馬直蓋親軍也莊宗後因事戲之謂其教王
溫反從謙不自安謀亂莊宗以射路左右皆奔走五坊
人善友聚樂器而焚之傳曰君以此始必以此終莊宗
好伶而弑於門高焚以樂器可不戒哉

臣按歐陽修言莊宗百戰滅梁方其盛也舉天下
豪傑莫能與之爭及其衰也數十伶人困之而身
死國亡為天下笑臣謂倡優子女其同類者也故

以附于女寵之後為世戒焉

以上論荒淫之戒



大學衍義卷三十三